



DECLARATION DV ROY
SVR L'ATTENTAT, FELONNIE
& rebellion du Duc de Mayenne,
Duc & Cheualier d'Aumale, &
ceux qui les assisteront.

HENRY par la grace de Dieu Roy
de France & de Pologne, à tous
presens & aduenir, Salut. Comme
il n'y ait commandement de Dieu,
Religion, ny Loy receuë entre les hommes,
qui puissent excuser le subiect de prendre les
armes sans l'ordonnance ou permission du
souuerain: auquel il a pleu à sa diuine bonté
donner toute auctorité sur luy, & à luy seul
reseruer le glauiue de puissance pour en vser à
la conseruation des bons, punition & chastim-
ent des mauuais: que sera-il du subiect qui
prend les armes contre son propre Roy Tres-
Chrestien, legitime & naturel: & si ce crime
est abominable deuant Dieu & deuant les
hommes, & doit estre la honte & la confu-
sion de ceux qui le commettent, il n'y a plus
de nom assez execrable entre les Chrestiens
pour les François, si par desloyauté, attentat,

Case

F

39

.326

1589fr

& felonnie, ils ne sont plus les enfans de leurs peres, ces anciens François, lesquels par tant de vertus au peril de leurs vies ont acquis & esté remarquez entre toutes les natiōs du monde, pour estre les plus fideles & les plus loyaux à leurs Rois. Et si à ce crime tant execrable on peut adiouster quelque accroissemēt pour les obligations, bien-faiçts & gratifications particulieres, receues par le subiect qui s'arme contre son bien-faiçteur & son Roy legitime & naturel, le Duc de Mayēne, les Duc & Cheualier d'Aumale sont dignes de ce nom, qui n'est point encore en vsage: & comme leur rebellion & desloyauté est sans mesure & sans exemple, aussi se doiuent-ils appeller les plus infideles & les plus desloyaux de ce monde, & laisser à leur posterité ceste marque de leur ingratitude & rebellion pour seruir de lustre à la loyauté de ceux qui seront demeurez fermes en leur fidelité, & en la iuste & legitime obeissance que Dieu leur commande porter & rendre à leur Roy. Or toutesfois iusques là estoit arriuee nostre clemence & bonté, que voulans oublier toutes choses passees, & les iustes occasions qu'ils nous auoient donnees de les traicter & chastier selon les demerites de leur desloyauté, recherchant en nous mesmes leur propre salut & la guarison de leurs playes par les nostres, voire la conseruation de leurs vies & de leur honneur aux

despens de nostre auctorité. Nous auons depuis quelques iours enuoyé deuers eux par plusieurs & diuerses fois aucuns de noz bons & fideles seruiteurs & subiects, avecques noz lettres bien expresses, & depuis encores par de nos Heraults d'armes, leur faire entendre nostre bonne & sainte intentiō, & que nous estions encores prests, non seulement d'oublier les choses passées, ains de les recevoir en nos bonnes graces, & les cherir & embrasser comme nos bōs & loyaux subiects, en faisant leur deuoir & les submissions que iustement ils nous doiuent. Neantmoins tout ainsi qu'une ame ambitieuse & desloyale est du tout incompatible avec l'assistance de son Dieu, & par son infidelité n'est plus susceptible de la raison qui la pouuoit contenir ou ramener à son deuoir. Comme aussi la Chenille qui se nourrist de la mesme liqueur dōt les mouches produisent le miel & la cire, & toutesfois la conuertist en venin: ainsi nostre bonté & clemence mises en l'estomac de telles personnes abandonnees de Dieu & de son S. Esprit, ont esté conuerties en corruption, & non point en la substance qu'ils en doiuent tirer: car au lieu de s'humilier comme ils deuoient, & recognoistre leur faute, ils en sont deuenus plus orgueilleux, & se sont precipitez opiniastrément eux-mesmes en la ruine de leurs ames, de leurs vies, de leur honneur & reputation, &

de leurs facultez domestiques. Se saisisans de nos villes & chasteaux, & entreprenans par leur desloyauté & rebellion contre nostre auctorité, nos Magistrats, & contre nos bons & loyaux seruiteurs & subiects, mesmes contre les Prelats, Euesques & autres gens d'Eglise, iusques à les emprisonner, piller leurs biens, les rançonner, & par tourmens leur faire resigner leurs benefices à gens de leur party, sans autre consideration de leur merite ou qualité seulement. Il suffit qu'ils ayent part en leur meschanceté, & par toutes autres voyes desmesurees, d'hostilité, de rebellion & felonnie, le tout souz couleur & pretexte de pieté & de religion, comme s'ils pouuoient seulement approcher de la nostre, & de celle de tant de gens de bien & d'honneur, qu'ils persecutent comme criminels seulement, pource qu'ils sont fideles seruiteurs & subiets de leur Roy: & qu'ils ne se veulent pas damner, ny auoir part en leur detestable rebellion. Ayant à la bouche ce qui est le plus eslongné de leur cœur, & faisant voile & manteau de l'honneur de Dieu pour resister à son expresse parole, & destruire par leur ambition, felonnie & desloyauté la Religio Catholique, Apostolique & Romaine, ainsi que desia par plusieurs fois ils ont fait en prenant nos villes & les armes, pour nous diuertir & empescher lors que nous estions le plus préparé & resolu d'aller

5

en personne faire la guerre aux Heretiques: aussi seroient-ils bien marris qu'il n'y en eust plus en France, pource que leur ambitieux dessein n'auroit plus de couuerture, & encores que par la grace de Dieu nous ne soyons tenus de rendre compte de nos actions qu'à sa diuine bonté seule: toutesfois afin que la simplicité d'aucuns de nos subiects ne soit point abusée de leurs fauces impostures, & n'estiment faussement que le feu duc de Guyse a esté chastié pource qu'il estoit protecteur & deffenseur de la Religio Catholique, Apostolique & Romaine, ou pour l'affectio qu'il auoit au soulagement du peuple: & à ceste occasion que lesdicts Duc de Mayenne, Duc & Cheualier d'Aumale & leurs associez ont vne grande & legitime occasion de s'vnir ensemble, tant pour leur conseruation particuliere & de la Religion, que pour la vengeance de celuy qui est mort pour eux, comme ils en font courir le bruit pour animer & seduire noz subiects, & couurir leur ambitieuse rebellion.

NOVS VOVLONS bien leur faire entendre que meschamment ils ont voulu couurir leur desloyauté de l'honneur de Dieu, accroissement de la Religion, & affection au public: car sans nous amuser aux particularitez de la vie desdicts feuz Duc de Guyse & de son frere, dont la memoire est encores trop fraise

che en ce Royaume, principalement entre ceux qui les cognoissent le mieux pour ne perdre temps à l'escire. Il nous suffira seulement de dire que peu de iours auparauant sa mort iceluy Duc de Mayenne entre autres choses nous manda par vn Cheualier d'honneur qu'il nous enuoya expres, que ce n'estoit pas assez à son frere de porter des patenostres au col: mais qu'il falloit auoir vne ame & vne conscience, que nous prinssions bien garde à nous, qu'il falloit que luy-mesme Duc de Mayenne ou ledit Cheualier vinsent pour nous en aduertir, & que le terme en estoit si brief, que s'il ne se hastoit il estoit bié à craindre qu'il n'arriueroit pas assez à temps. Pareillement les memoires & les lettres ne sont pas perdus des pratiques & recherches d'amitié qu'il a faictes avec le Roy de Nauarre & les heretiques, tant dedans que dehors le Royaume à quelque condition que ce fust, pourueu qu'on luy promist amitié & assistance à son establissement. On sçait assez quelles pensions il tiroit des estrangers, par quelles promesses, & à quelle fin. Les alliances qu'il a recherchees de ceux qu'il condamnoit le plus deuant les hommes comme fauteurs d'heresie ne sont incogneues qu'à ceux qui ne les veulent pas sçauoir. Ce sont les actes signalez qu'il auoit tirez de la vie des Apostres & des commandemens de Dieu, pour conseruer la Reli-

gion Catholique, Apostolique & Romaine,
& le soulagement du peuple: & au contraire
l'on sçait bien ou estoient employees nos ar-
mees, quelle estoit nostre intention d'y aller
en personne à ce printemps, & qu'il n'a pas te-
nu à nous que ledit duc de Mayenne n'ait fait
la guerre aux heretiques aussi bien que nostre
tres-cher & feal cousin le Duc de Neuers, qui
fust encores à continuer nostre entreprise, si
nos forces n'eussent esté diuerties par la des-
loyauté desdits Duc de Mayéne, Duc & Che-
ualier d'Aumale, comme desia iceluy Duc
d'Aumale fist le semblable en l'année dernie-
re par la surprinse de nos villes de Picardie: &
se peut dire par les œuvres de leurs mains,
que les Huguenots n'ont iamais trouué tant
de faueur, ny ce pauvre Royaume tant de mi-
sericorde & d'oppression, qu'en l'ame & en la vie
du feu Duc de Guyse, Duc de Mayenne, Duc
& Cheualier d'Aumale. Quant au soulage-
ment du peuple, soit considéré l'Estat à présent
de ce Royaume, les pertes & ruines qu'il a re-
ceues depuis l'année mil cinq cés quatre vingts
cinq, que lesdits feu Duc de Guyse, & les des-
susdicts de Mayenne & d'Aumale, prirent les
armes contre nous & nostre auctorité, & soit
fait iugement de la ruine prochaine de cedit
Royaume, par les choses aduenues depuis ce
temps-là, pour en faire comparaison avec les
années precedées quatre vingts trois & qua-

trevingts quatre : & le reglement que nous auions donné & commencé d'establi en cestuy nostredit Royaume à l'honneur de Dieu, & au soulagement de nostre peuple : & accordez son soulagemēt & les charges de la guerre ensemble, avec les œuures dudit feu Duc de Guyse & des dessus-nommez, lesquels depuis ce temps-là n'ont iamais posé les armes, tantost sous vn pretexte, tantost sous vn autre. Soit entendue aussi la contenance dudit feu Duc de Guyse, & de ceux qui l'assistoyent, lors que nous accordasmes aux deputez de nos Estats contre son esperance la descharge & reduction des tailles à celles de l'annee mil cinq cens soixante & seize. Pourueu qu'ils donnassent les moyens de remplacer le fonds, & satisfaire à l'entretienement de la dignité Royale & de l'Estat, & de faire la guerre que tous auoient demandee & iuree si solemnellement, dont eux-mesmes auroiēt l'administration des deniers par nos ordonnances, comme ils le nous promettoient : car lors d'un costé il nous dissuadoit de le faire & ne raualler point de nostre autorité : ains que nous nous en deuions faire croire, & de l'autre il pressoit ses partisans de faire telles instantes poursuittes, non point pour enuie qu'il en eust, mais pour nous rendre ou necessiteux ou odieux à nos subiects, avecques resolution, si nous le refusions de rompre les
Estats

Estats sur vne occasion si plausible au peuple, & de rapporter l'honneur & le degré de ce qu'il vouloit moins faire, reiettant sur nous l'enuie de ce que nous auions en extreme volunté: & que nous fîmes pour la grande affection que nous portons au soulagemēt de nos subiects autant qu'il nous est possible, & que la conseruatiō de nostre Estat le nous permet contre son aduis & conseil, & toutes les remonstrances qu'il nous fist & fist faire au cōtraire: & pour le regard de ses comportemens enuers nous. Apres luy auoir remis & pardonné toutes ses fautes premieres, iusques-là estoit arriuee sa temeraire arrogance que les opinions n'estoient plus libres en nostre Cōseil, il s'en faisoit croire: L'execution des arrests & iugemens donnez en nos Cours souveraines contre les plus criminels & scelerats de ce Royaume, estoit retardee pour ne les pouuoir apprehender, & ce pendāt ils estoiet en seureté à sa suite & en sa chambre, & leur faisoit bailler logis à nostre Cour, ils estoient les plus gens de bien & les plus zelez Catholiques de ce Royaume, puis qu'ils estoient de son party: & au contraire le plus homme de bien & le meilleur Catholique estoit Heretique, ou pour le moins Politique, s'il ne vouloit iurer & auoir part en sa trahison. Aussi faisoit-il bien tout ce qu'il pouuoit pour faire cognoistre à vn chacun, & estoit l'vn de

ses artifices, qu'il pouuoit tout ce qu'il vouloit, que nous nous estions iettez entre ses bras, iusques à le faire semer par nos Prouinces, & auoir braué des deputez de nos Estats generaux qui ne vouloient pas despendre de luy, & changer leurs cayers à sa volonté, encores qu'il n'y en eust que trop de tels choisis & nommez par sa violéce. Tesmoin que tous les iours à heures reglees il se tenoit vn conseil en sa chambre des choses proposees, & de ce qui se deuoit conclurre aux Estats, par brigues, menees ou violence, selon ce qui en auroit esté resolu par ledit Duc de Guyse & ses partisans, à la veuë de tout le monde, & en faisoit gloire, il n'y auoit plus de seureté qu'en sa protection, & estoit crime de leze Maieité d'estre nostre fidele seruireur, donnant pour marque d'iniure *il est Royal*, & pour tiltre d'honneur, *il est Guyfard*, il vouloit iniustement commander à celuy que Dieu auoit constitué sur luy en toute auctorité & souueraine puissance: & vouloit par les propres bien-faiçts, les hōneurs & l'auctorité que son Roy luy auoit donnee, luy oster sa Couronne & la vie, pour le moins aussi tost qu'il auroit vn peu mieux estably son auctorité qu'elle ne l'estoit encore, si tant il nous eust laissé de longue vie: car il est tout certain & biē verifié qu'il auoit desia tellemēt pourueu à son dessein, qu'il se tenoit pour maistre de nostre chasteau & de nostre

personne, il en auoit illicitement eu les clefs
 iusques à celles de nos salles, les armes propres
 à l'exécution de son dessein & inutiles à autre
 exploit de guerre ont esté trouuees, encores
 que les siens ayent fait tout leur effort de les
 destourner pour en faire perdre la cognois-
 sance, & les hommes estoient tout à l'entour
 de nous. Les compagnies de nos Ordonnan-
 ces que nous auions ordonnees pour la seu-
 reté de nous & de nosdits Estats, auoient esté
 par luy licenties iusques à auoir exempté par
 ses lettres signees de luy, & sceellees du sceau
 de ses armes les habitans de Remorantin de
 receuoir vne partie de celle du sieur de Sou-
 uray, que nous auions ordonnee, & les auoir
 pris en sa protection & sauuegarde contre
 nos lettres Patentes, sur le departement que
 nous en auions fait avec luy-mesmes, deffen-
 dant tres-expressement au Commissaire gene-
 ral des viures de nostre Royaume, de leur de-
 mander aucuns viures pour icelle compagnie
 ny autre, & pour faire plus ouuertement co-
 gnoistre qu'il ne vouloit plus despendre que
 de luy-mesmes. Telle fut son outrecuidance,
 en la presence & au cabinet de la feue Royne
 nostre tres-honoree Dame & bonne mere, &
 de plusieurs Princes & Seigneurs qui lors y
 estoient presens, que quand se vint à propo-
 ser les crimes de leze Maiesté, pour les faire
 renouueller & iurer en plaine assemblee de

nostdicts Estats, ils nous respondit impudemment qu'il n'en feroit rien, & qu'il ne les iureroit point, que s'il y failloit nous le fissions chastier, & toutesfois contre tout cela & infinis autres particuliers aduis qui nous estoient donnez tous les iours de ses comportemēs & menées par noz bons fideles & loyaux subiects & seruiteurs, nous passions toutes ces choses doucemēt, nous faisans croire que nostre grande patience & nos bien-faits enquoy nous n'espargnons vne seule gratificatiō qui fust en nostre puissance pour eux ou pour les leur, romproit la dureté de leur cœur, & les rameneroit à la iuste obeissance qu'ils nous deuioient, puis que la fierté des lyons & des animaux plus sauuages est domptee par bien-faicts, mais comme l'ambition de regner est insatiable & sans fin, & que celuy qui offense ne pardonne iamais, l'insolence croissoit tous les iours, & par homme expres que de pescha ledict Duc d'Aumale, nous fusmes aduertis qu'il s'estoit trouué de presence & nō de uolonté (ce disoit-il) en vn Conseil tenu à Paris, auquel il auoit esté resolu que ledit Duc de Guyse se saisiroit de nostre personne, & nous meneroit à Paris, & toutesfois nous ne voulusmes pour nos premieres considerations auoir tel égard à cest aduis que nous deuions: Mais voyant celuy que depuis nous enuoya ledit Duc de Mayēne, & que le terme en estoit

si brief qu'il n'y auoit plus de salut pour nous qu'en la preuention de la vie de ceux qui la nous vouloient oster & vsurper nostre Estat & Couronne, nous fusmes contraincts d'en vsfer & faire en leurs personnes non ce qu'ils meritoient par leur desloyale felonnie, mais selon la saison, ce que nous deuions & que nous ne vouliôs pas faire. C'est la recompense qu'ils auoient preparee à nos gratifications & bien-faiçts, & qui est aujourd'huy suiuiue par ceux qui durant leur vie faisoient semblât de condamner leurs conseils, & eux-mesmes nous en donnoient aduis pour reseruer à ce que nous recognoissons maintenât par leurs œuures, à eux & à leur ptofit particulier, le fruiçt de ce dessein ambitieux d'empire, employant cest ancien prouerbe, *Que si le droit est violable, il doit estre violé pour regner*; & faut croire par leurs actions, ou n'auoir point de iugement, que comme tous ensemble s'accordent maintenant à nous oster la vie & la couronne que Dieu nous a donnee, ils diffi- peroient bien tost ou debattroient entr'eux à qui auroit celle qu'iniustement ils veulent vsurper s'ils auoiët moyé de l'enuahir. Ayans desia entrepris auctorité de disposer & ordōner par lettres Patentes des Gouverneurs de noz Prouinces, & de la leuee & distribution de nos Finances. Mais pource que la patience doit estre bornee & reglee de certains limi-

tes, outre lesquels elle ne peut estre louable en vn Prince, qui doit la conseruation de son honneur, de son auctorité & de sa vie à son Estat & à soy-mesmes.

Nous à ces causes & autres bonnes & iustes considerations à ce nous mouuās. Auons par l'aduis des Princes de nostre sang, Cardinaux, Prelats, Seigneurs, & autres de nostre Conseil. Declaré & declarons par ces presentes signees de nostre propre main. Lesdits Duc de Mayenne, Duc & Cheualier d'Aumale, descheuz de tous les Estats, Offices, hōneurs, pouuoirs, Gouuernemens, charges, dignitez, priuileges & prerogatiues, qu'ils ont par cy deuant euz de nous & des Roys noz predecesseurs. Et lesquels nous auons reuoquez & reuoquons dès à present. Et les auons declarez infideles, rebelles, attaincts & conuaincus des crimes de rebellion, felonnie, & de leze Maiesté au premier chef. Voulōs que comme tels il soit procedé contre eux, & tous ceux qui les assisteront, de viures, conseil, confort, aide, force ou moyen, Et contre leur posterité par toutes les voyes & rigueurs des Ordonnances faites sur lesdits crimes. Sauf si dans le premier iour du mois de Mars prochain pour toutes prefixions & delaiz, ils recognoissent leur faute, & se remettent en l'obeissance que iustement ils nous doiuent par le cōmandement & l'expresse parole de Dieu, contre

laquelle ils ne se peuuent dire Chrestiens. Afin que satisfaisant à nous mesmes, nous n'ayons oublié vne seule bonté, clemence & douceur, qui les ait peu retirer de leur faute, & ramener à leur deuoir. Enioignant au premier de nos Huissiers, Sergens ou autres Officiers que celsdites presentes ils leur signifient, soit en personne & ensemblement, ou en particulier. Et où il n'y auroit seureté de ce faire, Voulons & nous plaist, que la signification qui en sera faicte aux portes ou murailles de leurs domiciles, ou des villes & fauxbourgs, ausquels ils se retrouueront par le premier de nos trompettes: & où il n'en pourroit approcher seurement pour cest effect, au plus prochain bourg ou village, vaille & soit de telle force & valeur, que si elle estoit faicte à leurs personnes. Mandôs en outre & adiurons tous nos bons fideles & loyaux subiects, de quelque qualité & condition qu'ils soient, par la loyauté que iustement ils nous doiuent, & que Dieu & leur honneur leur commande, & par les cendres & la memoire de leurs peres: lesquels par tant d'annees, & avec tant de peines, de sueurs & de traux leur ont acquis ce precieux thresor & nom immortel de tres-fideles à leur Roy, Qu'en cest affaire de telle importance, qui est la conseruation ou la ruine non seulement de nostre auctorité, mais de la Religion Chrestienne, de l'Estat &


d'eux-mesmes, ils ayent à courir sus ausdicts infideles & rebelles. Et à nous assister de leurs forces & moyens, & se rendre aupres de nous au premier mandemét qu'ils en auront, pour chastier ceux qui voudront perseuerer en leur rebellion. Et remettre nostre auctorité, ensemble nostre estat en leur premiere splendeur & dignité, à l'honneur de Dieu, conseruation de nostre Religion Catholique, Apostolique & Romaine, & soulagement de nos subiects. A quoy nous sommes resolus d'employer tous nos moyens & nostre propre vie. Et afin qu'aucun n'en puisse pretendre cause d'ignorance. Nous auons ordonné & ordonnons que celsdictes presentes seront leuës & publiees par toutes nos Cours souueraines & sieges Royaux: Car tel est nostre plaisir. En tesmoin dequoy nous auõs à icelles fait mettre & apposer nostre seal, afin que ce soit chose fermé & stable à tousiours. Donné à Blois au mois de Feurier, l'an de grace 1589. Et de nostre regne le 15.

Ainsi signé, HENRY.

Et plus bas, Par le Roy, R V Z E.

Et seellé du grand seal de cire verte, sur laz de soye rouge & vert.

DECLA-



DECLARATION DV ROY
SVR L'ATTENTAT, FELONNIE
& rebellion des villes de Paris, Orleans,
Amyens, Abbeville, & autres leurs ad-
herants.

HENRY par la grace de Dieu Roy de
France & de Pologne, à tous presens
& aduenir, Salut. Dieu qui de rien a
créé l'homme à sa semblance par sa diuine bon-
té, & toutes choses pour luy seruir. Ce mesme
Dieu a constitué les Rois avec toute auctori-
té & souueraine puissâce sur les peuples qu'il
leur a donnez pour regir & gouverner. Par ce
bel ordre que ceux-cy obeiroiét à ce qui leur
seroit commandé, & le Prince leur comman-
deroit sa volonté comme à ses subiects: de
sorte qu'il ne se peut nier que qui desobeist à
son Prince legitime & naturel, ne resiste à
l'expresse parole de Dieu, & qui ne faict ses
commandemens, & se dit son fils, il est men-
teur. Or entre les Rois instituez de Dieu nous
sommes par sa grace nommé Tres-Chrestien,
& le premier de tous les Rois Chrestiens, &
les François ont esté remarquez par dessus
toutes les nations du monde pour les plus

fideles & les plus loyaux seruiteurs & subiects à leurs Rois, à ceste dignité Royale que Dieu par sa grace nous a donnee avec le glaive de puissance pour la conseruation des bons & le chastiment des mauuais. Nous auons adiousté toutes les gratifications & bien-faits, tous les octrôis, concessions & honneurs, desquels nous auons peu decorer, enrichir & agrandir nos villes de Paris, Orleans, Amyens, & Abbeuille, & ne leur auons iamais desnié chose que nous ayons peu faire à leur soulagement & accroissement pour les contenir & esmouuoir tousiours d'auantage à l'obeissance que iustement ils nous doiuent: mais comme le cheual engraisé par le soin & la despense que son maistre a employez à le faire bien penser, donne vn coup de pied à son bienfaicteur, pour ceste seule raison qu'il est trop gras & qu'il l'a trop bien traicté, & ne veut plus que son maistre môte sur luy. Ainsi lesdites villes de Paris, Orleans, Amyens & Abbeuille, pour auoir esté de nous gratifiees par dessus les autres de cestuy nostre Royaume, & leur auoir trop laissé de liberté, ont par mespris des comandemens de Dieu & par trop grande ingratitude pris les armes, & se sont esleuez cōtre nous, leur Roy legitime & naturel, voulans par leur desloyauté nous oster la vie & l'auctorité en recompense de nos liberalitez, & pour les auoir esleuez plus qu'ils ne

l'auoient merit   : & toutesfois pource que la simplicit   d'aucuns peut auoir est   sedu  te par fausses impostures & sous pretexte de piet   ou de Religion . Considerant aussi l'innocence des autres qui habitent en icelles villes, sans auoir eu part en si damnable Conseil, afin de ne perde point les bons par l'iniquit   des mesch  s. Toutes ces c  siderations iointes    nostre clemence naturelle nous auoient fait oublier non seulement les choses pass  es, ains rechercher nous m  mes ceux qui no   auoient si grieffement offencez pour les recevoir en nos bonnes gr  ces & les cherir & embrasser comme nos bons & loyaux subiets, en recognoissant leurs fautes & faisant les submissions que iustement ils nous doiuent: mais au lieu de se recognoistre & s'humilier, comme gens abandonnez de Dieu, par le mespris & desobeissance faite    son expres commandement & par la felonnie & attentat qu'ils ont commis contre leur Roy legitime & naturel, ils ont vomy leur rage contre nostre auctorit  , contre les Euesques, Prelats, Magistrats, Noblesse, & toutes sortes de gens sans aucune distinction ny consideration de qualit   ou de crime, seulement pource qu'obeissans    l'expresse parole de Dieu ils estoient fideles    leur Prince, & ne vouloient pas comme eux estre rebelles & infideles    Dieu &    leur Roy, iusques    auoir faict mourir & par

violence desmis des Curez de leurs charges, pour auoir seulemēt exhorté le peuple à prier Dieu pour leur Roy, & comme leſdites villes ſont extremes en leur deſloyauté, felonnie & rebellion, auſſi n'ont elles iuſques à ceſte heure oublié ny pardonné à vne ſeule eſpece de barbare cruauté, iuſques au ſacrilege. Et feront encores pis, ſ'il n'y eſt pourueu par chaſtimens dignes de leur felonnie & deteſtable rebellion. N o u s à ces cauſes & autres bonnes & iuſtes conſiderations à ce nous mouuans. Auons par l'aduiſ des Princes de noſtre ſang, Cardinaux, Prelats, Seigneurs, & autres de noſtre Conſeil, déclaré & déclarōs par ces preſentes ſignées de noſtre propre main. Leſdites villes de Paris, Orleans, Amyens, Abbeuille, & toutes les autres ſi aucunes y en a qui les aſſiſtent, deſcheues de tous les Eſtats, Offices, honneurs, pouuoir, Gouuernemens, charges, dignitez, priuileges, prerogatiues, dons, octrois & conceſſions quelconques, qu'ils ont par cy deuant eu de nous & des Rois nos predeceſſeurs, & leſquels nous auons reuocquez & reuocquons dès à preſent. Et les auons déclarez & déclarons rebelles, attainctes & couuaincues des crimes d'attentats, felonnie, & de leze Maieſté, au premier chef. Voulons que comme telles, il ſoit procedé contr'elles, & tous ceux qui y habitent & les aſſiſteront de viures, conſeil, confort, aide, force ou

moyés, & contre leur posterité, par toutes les voyes & rigueurs des Ordonnances faites sur lesdits crimes. Sauf si dans le quinziésme iour du mois de Mars prochain, ils recognoissent leur faute, & se remettent en l'obeissance que iustement ils nous doiuent par le commandement & l'expresse parole de Dieu, contre laquelle ils ne se peuuent dire Chrestiens, enioignant sur les mesmes peines aux Officiers de nos Cours de Parlement, Chambre des Comptes, Generaux des Aides, Chancellerie, Bureaux de nos Finances, Chambre des Monnoyes, Sieges Presidiaux, Bailliages, Seneschauſſees, Preuoſtez, Electiōs & autres corps & compagnies tant de Iudicature que de Finances, Huiffiers, Notaires & Sergens, & generallyment à tous nos autres Officiers qui sont esdictes villes, d'en sortir incontinent apres que ces presentes seront venues à leur cognoissance, par quelque voye & maniere que ce soit, pour se rendre aupres de nous, ou autres lieux qui leur serōt par nous ordōnez. Et illec rendre la Iustice à nos subiets, & faire les autres fructiōs de leurs charges, l'exercice desquelles, nous leur auons interdit & defendu, interdisōns & deffendons ausdites villes, ensemble toute Cour, Iurisdiction & cognoissance, declarant dès à present, nul & de nul effect & valeur, tout ce qui sera par eux fait, geré & attenté contre, & au preiudice de

cesdites presentes. Par lesquelles nous mādōs au premier de nos Huiffiers, Sergés ou autres Officiers, que cesdites presentes ils leur signifient, soit en corps ou en particulier. Et où il n'y auroit leur accez. Voulons & nous plaist, que la signification ou affiches qui en seront faictes aux portes, murailles & faux-bourgs desdictes villes, par le premier de nos Trompettes. Et où il n'en pourroit approcher pour cet effect, au plus prochain bourg ou village, vaille & soit de telle force & vertu, comme si elle estoit faite à leurs propres corps, compagnies & personnes. Faisant inhibitiōs & defences à tous nos subiects, de poursuiure esdictes villes, pardeuant icelles Cours, Sieges & Officiers, aucune expedition, soit de Iustice ou autrement, à peine aussi de nullité, & d'estre declarez fauteurs & adherans desdits rebelles, seditieux & desloyaux. Mandons en outre & adiurons tous nos bons fideles & loyaux subiects, de quelque qualité & condition qu'ils soient, par la fidelité que iustement ils nous doiuent, & que Dieu & leur honneur commande, & par les cendres & la memoire de leurs peres. Lesquels par tant d'annees & avec tant de peines, de sueurs & de traux leur ont acquis, ce precieux tresor & nom immortel, de tres-fideles à leur Roy. Qu'en cest affaire de telle importance, qui est la conseruation ou la ruine, non seulement de nostre

auctorité, mais de la Religion Chrestienne, de l'Estat, & d'eux-mesmes : ils ayent à courir sus ausdits trahistres & rebelles, & à nous assister de leurs forces & moyens, & se rendre apres de nous au premier mandement qu'ils en auront, pour chastier ceux qui voudront per-seuerer en leur trahison. Et remettre nostre auctorité ensemble nostre Estat, en leur premiere splendeur & dignité, à l'honneur de Dieu, conseruation de nostre Religion Catholique Apostolique & Romaine, & soulagement de nos subiects. A quoy nous sommes resolu, d'employer tous nos moyens & nostre propre vie. Et afin qu'aucun n'en puisse pretendre cause d'ignorance, Nous auons ordonné & ordonnons, que celsdites presentes serôt leues & publiees par toutes nos Cours souueraines & sieges Royaux, qui sont du ressort dudit Parlemēt: Car tel est nostre plaisir. En tesmoin dequoy nous auons faict mettre & apposer nostre seel à icelles, afin que ce soit chose ferme & stable à tousiours. Donné à Bloys, au mois de Feurier, l'an de grace 1589. Et de nostre regne le 15.

Ainsi signé,

HENRY.

Et plus bas, Par le Roy, R V Z E.

Et seellé du grand seel de cire verde, sur laz de foye rouge & vert.

